

I. DISPOSICIÓN XERAIS

MINISTERIO DE INDUSTRIA, ENERXÍA E TURISMO

12100 *Orde IET/2176/2014, do 20 de novembro, pola que se desenvolve a metodoloxía de cálculo e se fixa o tipo de xuro definitivo que devindicarán os dereitos de cobramento dos déficits de ingresos e os desaxustes temporais do sistema eléctrico anteriores a 2013.*

A disposición transitoria primeira do Real decreto lei 6/2009, do 30 de abril, polo que se adoptan determinadas medidas no sector enerxético e se aproba o bono social, modificada polo artigo 22 do Real decreto lei 6/2010, do 9 de abril, de medidas para o impulso da recuperación económica e o emprego, establece respecto do mecanismo transitorio de financiamento do déficit nas actividades reguladas no sector eléctrico ata a titulización que: «As empresas terán dereito a recuperar as achegas por este concepto, e recoñeceráselles un tipo de xuro en condicións equivalentes ás do mercado, que empezará a devindicarse a partir do 1 de xaneiro do ano seguinte, e que deberá ser considerado de forma expresa nas disposicións de aprobación das peaxes de acceso do período seguinte, con inclusión do importe correspondente como custo permanente do sistema».

A disposición adicional vixésimo primeira da Lei 54/1997, do 27 de novembro, do sector eléctrico, na súa redacción dada pola disposición derradeira primeira da Lei 24/2013, do 26 de decembro, do sector eléctrico, establece, nos seus puntos segundo e quinto, respecto das cantidades achegadas para os déficits e desaxustes ata o ano 2012 inclusive que «as cantidades achegadas serán devoltas e se recoñecerá un tipo de xuro en condicións equivalentes ás do mercado».

Nas sucesivas ordes de peaxes de acceso veuse fixando un tipo de xuro provisional de devindicación dos dereitos de cobramento dos desaxustes temporais a partir de 2009 e para os distintos déficits. Así, a Orde ITC/3353/2010, do 28 de decembro, modificada pola Orde ITC/1068/2011, do 28 de abril, pola que se establecen as peaxes de acceso a partir do 1 de xaneiro de 2011 e as tarifas e primas das instalacións do réxime especial, establece como tipo de xuro provisional do 2 por cento que devindicarán os dereitos de cobramento do desaxuste temporal do déficit de ingresos previsto para o ano 2009.

Pola súa parte, a Orde ITC/688/2011, do 30 de marzo, pola que se establecen as peaxes de acceso a partir do 1 de abril de 2011 e determinadas tarifas e primas das instalacións do réxime especial, establece como tipo de xuro provisional que devindicarán os dereitos de cobramento do déficit 2010 o 2 por cento. E o tipo de xuro que devindicarán os dereitos de cobramento do desaxuste temporal do déficit de ingresos, previsto para 2011 a partir do 1 de xaneiro de 2012, establécese provisionalmente nun 2,00 % na disposición adicional primeira da Orde IET/843/2012, do 25 de abril, pola que se establecen as peaxes de acceso a partir do 1 de abril de 2012 e determinadas tarifas e primas das instalacións do réxime especial.

De igual modo, o artigo 3 da Orde IET/221/2013, do 14 de febreiro, pola que se establecen as peaxes de acceso a partir do 1 de xaneiro de 2013 e as tarifas e primas das instalacións do réxime especial, recolle que «o tipo de xuro que devindicarán os dereitos de cobramento do déficit orixinado polo desaxuste temporal de liquidacións do sistema eléctrico de ingresos para 2012 a partir do 1 de xaneiro de 2013, ata que se desenvolva unha metodoloxía de cálculo definitiva, será provisionalmente dun 2,00 por cento».

A presente orde ten por obxecto establecer unha metodoloxía para a determinación do tipo de xuro en condicións equivalentes ás do mercado para os titulares dos dereitos de cobramento de déficit de ingresos dos anos 2010, 2011 e 2012 ata a súa cesión ao Fondo de Titulización do Déficit do Sistema Eléctrico definido na disposición adicional vixésimo primeira da Lei 54/1997, do 27 de novembro, e os desaxustes temporais desde o ano 2009 ao ano 2012 inclusive.

Con este ámbito de aplicación dáse cumprimento, no relativo ao recoñecemento dun tipo de xuro de mercado aos desaxustes, á sentenza da Sala Terceira do Contencioso-Administrativo do Tribunal Supremo, do 11 de xuño de 2013, pola que se estimou parcialmente o recurso ordinario 769/2011, á sentenza da Sala do Contencioso-Administrativo do Tribunal Supremo, do 18 de decembro de 2013, pola que se estimou parcialmente o recurso ordinario 765/2011, á sentenza da Sala do Contencioso-Administrativo do Tribunal Supremo, do 18 de xuño de 2013, pola que se estimou parcialmente o recurso ordinario 52/2012 e á sentenza da Sala do Contencioso-Administrativo do Tribunal Supremo, do 12 de xullo de 2013, pola que se estimou parcialmente o recurso ordinario 203/2012.

De acordo co previsto na disposición adicional décimo primeira.terceiro.1.segunda da Lei 34/1998, do 7 de outubro, do sector de hidrocarburos, a presente orde recibiu o informe favorable da Comisión Nacional de Enerxía e, para a elaboración deste informe, tomáronse en consideración as observacións e os comentarios do Consello Consultivo de Electricidade da dita comisión, a través do cal se realizou o trámite de audiencia e as consultas ás comunidades autónomas.

Mediante acordo do 20 de novembro de 2014, a Comisión Delegada do Goberno para Asuntos Económicos autorizou o ministro de Industria, Enerxía e Turismo a ditar a presente orde.

Na súa virtude, de acordo co Consello de Estado, dispoño:

CAPÍTULO I

Obxecto e ámbito de aplicación

Artigo 1. *Obxecto.*

O obxecto da presente orde é establecer a metodoloxía de cálculo do tipo de xuro definitivo que se aplicará aos déficits e desaxustes de ingresos do sistema eléctrico anteriores a 2013.

Artigo 2. *Ámbito de aplicación.*

A presente orde ministerial será de aplicación aos dereitos de cobramento orixinados:

- Polos déficits de ingresos no sistema eléctrico desde o ano 2010 ata o ano 2012 inclusive.
- Polos desaxustes temporais desde o ano 2009 ata o ano 2012 inclusive.

CAPÍTULO II

Determinación do tipo de xuro

Artigo 3. *Determinación do tipo de xuro que devindicarán os dereitos de cobramento dos déficits de ingresos e dos desaxustes temporais.*

O tipo de xuro definitivo que devindicarán os dereitos de cobramento dos déficits de ingresos, desde o ano 2010 ata o ano 2012 inclusive, e dos desaxustes temporais, desde o ano 2009 ata o ano 2012 inclusive, determinarase mediante a suma dun tipo de xuro de referencia máis un diferencial de acordo coa seguinte formulación:

$$i_t = i_t^{\text{ref}} + \text{Dif}_t$$

Onde:

i_t é o tipo de xuro que devindican no ano t os dereitos de cobramento dos déficits de ingresos e desaxustes temporais, expresado en porcentaxe con tres decimais.

i_t^{ref} é o tipo de xuro de referencia no ano t . Este parámetro tomará o valor do *Interest Rate Swap* (IRS) a un ano da media das cotizacións dos meses de outubro, novembro e decembro do ano $t-1$, expresado en porcentaxe con tres decimais. A media será o

resultado de dividir a suma das cotizacións diarias de todos os días hábiles segundo o calendario TARGET do Banco Central Europeo do período que se vaia considerar, entre o número total de días hábiles do dito período.

Dif_t é o diferencial do ano t . Este parámetro tomará como valor a media ponderada dos *Credit Default Swaps* (CDS) a 1 ano das cotizacións dos meses de outubro, novembro e decembro do ano $t-1$, dispoñibles para os comparadores de referencia, expresado en porcentaxe con tres decimais.

Para o cálculo do valor do CDS de cada unha das empresas tomarase o resultado de dividir a suma das cotizacións diarias de todos os días hábiles segundo o calendario TARGET do Banco Central Europeo do período que se vaia considerar, entre o número total de días hábiles do dito período.

Artigo 4. *Determinación dos comparadores de referencia.*

Para o cálculo do termo Dif_t do artigo 3 de aplicación aos dereitos de cobramento sinalados nas letras a) e b) do artigo 2 da presente orde, os comparadores de referencia serán as empresas eléctricas que, de acordo co disposto na disposición adicional vixésimo primeira da Lei 54/1997, do 27 de novembro, financiasen os déficits e desaxustes temporais aos cales se lles aplicará o tipo de xuro.

Para o cálculo do termo Dif_t os CDS dos comparadores estarán ponderados de acordo cos coeficientes con que as ditas empresas eléctricas financiaron os correspondentes déficits e desaxustes.

CAPÍTULO III

Cálculo dos xuros definitivos devindicados e do importe pendente de cobramento en relación cos déficits e desaxustes de ingresos anteriores ao ano 2013

Artigo 5. *Cálculo dos xuros definitivos devindicados no ano t .*

Para cada un dos déficits e desaxustes de ingresos anteriores ao ano 2013, sinalados no artigo 2 da presente orde, o importe dos xuros definitivos devindicados polos dereitos pendentes de cobramento no ano t calcularase de acordo coa seguinte formulación:

$$I_{total-t} = i_{imp.NCed-t} + I_{imp.Ced-t}$$

Onde:

$I_{total-t}$ importe total dos xuros definitivos derivados da aplicación do tipo de xuro i_t no ano t .

$i_{imp.NCed-t}$ importe total dos xuros definitivos derivados da aplicación do tipo de xuro i_t no ano t aos dereitos de cobramento non cedidos no ano t . Esta cantidade calcularase por aplicación da seguinte expresión:

$$i_{imp.NCed-t} = INCed_t \cdot i_t$$

Onde:

$INCed_t$ é o importe dos dereitos de cobramento aínda non cedidos no ano t .

i_t é o tipo de xuro definido no artigo 3 da presente orde que devindiquen no ano t os dereitos de cobramento dos déficits de ingresos e desaxustes temporais.

$I_{imp.Ced-t}$ importe total dos xuros definitivos derivados da aplicación do tipo de xuro i_t no ano t aos dereitos de cobramento cedidos no ano t . Esta cantidade calcularase por aplicación da seguinte expresión:

$$I_{imp.Ced-t} = \sum_{\forall \text{ cesión } c \text{ do ano } t} IC_{c-t} \cdot \left(\frac{n_c}{n_t} \right) \cdot i_t$$

Onde:

- IC_{c-t} é o importe dos dereitos de cobramento cedidos na cesión c do ano t .
 i_t é o tipo de xuro definido no artigo 3 da presente orde que devindiquen no ano t os dereitos de cobramento dos déficits de ingresos e desaxustes temporais.
 n_c é o número de días transcorridos no ano t ata a cesión c .
 n_t é o número de días do ano t .

Artigo 6. *Cálculo do importe pendente de cobramento no ano t para o cálculo dos xuros devindicados no ano $t+1$ para os déficits e desaxustes de ingresos anteriores ao ano 2013.*

O cálculo do importe pendente de cobramento o 31 de decembro do ano t , IPC_t , para cada un dos déficits e desaxustes de ingresos anteriores ao ano 2013 sinalados no artigo 2 da presente orde, realizarase de acordo coa seguinte formulación:

$$IPC_t = IPC_{t-1} + I_{total-t} - Anualidade_t - \sum_{\forall \text{cesión } c \text{ do ano } t} IC_{c-t}$$

Onde:

IPC_{t-1} importe pendente de cobramento o 31 de decembro do ano $t-1$, para os déficits e desaxustes de ingresos anteriores ao ano 2013.

$I_{total-t}$ importe total dos xuros definitivos calculados de acordo coa formulación do artigo 5 da presente orde.

$Anualidade_t$ importe da anualidade devindicada con cargo a peaxes no ano t .

IC_{c-t} importe que fose desembolsado pola Comisión Nacional dos Mercados e da Competencia ou pola extinta Comisión Nacional de Enerxía a cada empresa eléctrica financiadora, como consecuencia da cesión c ao Fondo de Titulización realizada no ano t .

Artigo 7. *Procedemento de liquidación do tipo de xuro definitivo devindicado polos déficits e desaxustes anteriores ao ano 2013.*

1. A liquidación do tipo de xuro definitivo dos déficits e desaxustes de ingresos anteriores ao ano 2013, sinalados no artigo 2 da presente orde, realizarase de acordo co disposto na Lei 24/2013, do 26 de decembro, do sector eléctrico, e na súa normativa de desenvolvemento.

2. A satisfacción dos saldos resultantes entre a aplicación do tipo de xuro que transitoriamente se devindicou e o tipo de xuro definitivo levarase a cabo na liquidación complementaria da 14 do exercicio 2013.

Disposición transitoria única. *Tipo de xuro definitivo que devindicarán os dereitos de cobramento dos déficits e os desaxustes temporais de ingresos anteriores ao ano 2013.*

1. O tipo de xuro provisional devindicado para os dereitos de cobramento dos déficits de ingresos de 2010, 2011 e 2012 e dos desaxustes temporais dos déficits de ingresos para 2009, 2010, 2011 e 2012 do sistema eléctrico, recollidos na normativa sectorial, será revisado co valor do tipo de xuro definitivo que resulte de aplicar a metodoloxía de cálculo establecida na presente orde.

2. En aplicación da metodoloxía prevista nos artigos 3 e 4 da presente orde, os tipos de xuro definitivos para os anos 2010, 2011, 2012, 2013 e 2014 denominados i_{2010} , i_{2011} , i_{2012} , i_{2013} e i_{2014} respectivamente serán os que figuran no anexo da presente orde ministerial.

Disposición derradeira primeira. *Título competencial.*

A presente orde dítase ao abeiro do establecido no artigo 149.1.13.^a e 25.^a da Constitución española, que lle atribúen ao Estado a competencia exclusiva en materia de

bases e coordinación da planificación xeral da actividade económica, e bases do réxime mineiro e enerxético.

Disposición derradeira segunda. *Entrada en vigor.*

A presente orde entrará en vigor o día seguinte ao da súa publicación no «Boletín Oficial del Estado».

Madrid, 20 de novembro de 2014.–O ministro de Industria, Enerxía e Turismo, José Manuel Soria López.

ANEXO

Tipos de xuro dos anos 2010, 2011, 2012, 2013 e 2014

Ano	Tipo de xuro de referencia: i_t^{ref}	Diferencial do ano t: Dif_t	Tipo de xuro i_t
2010	1,2379 %	0,4800 %	$i_{2010} = 1,7179 %$
2011	1,3747 %	0,7374 %	$i_{2011} = 2,1121 %$
2012	1,5520 %	1,7429 %	$i_{2012} = 3,2949 %$
2013	0,3580 %	0,4249 %	$i_{2013} = 0,7829 %$
2014	0,3961 %	0,2276 %	$i_{2014} = 0,6237 %$